

TEKS UCAPAN
YB DATO' SRI HJ. FADILLAH BIN HJ. YUSOF,
MENTERI KERJA RAYA MALAYSIA

MAJLIS PERASMIAN
PROGRAM KHIDMAT KOMUNITI CREAM BERSAMA
RUMAH KANAK-KANAK TOH PUAN HAJAH NORKIAH, KUCHING
SARAWAK

10 DISEMBER 2017 (AHAD)
12.30 TENGAH HARI

Assalamualaikum WBT, Salam Sejahtera dan Salam Negaraku Malaysia

1. Alhamdulillah, bersyukur kita ke hadrat ALLAH SWT kerana dengan limpah kurnia dan rahmatnya, kita dapat bersama-sama berkumpul pada hari ini bersempena Program Khidmat Komuniti CREAM Bersama Rumah Kanak-Kanak Toh Puan Hajah Norkiah, Kuching, Sarawak.
2. Terlebih dahulu, saya ingin merakamkan ucapan terima kasih dan tahniah kepada Construction Research Institute of Malaysia (CREAM) yang buat julungkalinya menganjurkan program khidmat komuniti di Kuching dengan kerjasama Akademi Binaan Malaysia Negeri Sarawak. Gandingan mantap kedua – dua anak syarikat Lembaga Pembangunan Industri Pembinaan Malaysia (CIDB) ini telah menjadikan program pada hari ini berjalan dengan lancar dan mencapai objektif sebagaimana yang dihasratkan.
3. Saya amat berharap supaya semangat kesepakatan dan kerjasama ini disemarakkan di kalangan kita semua dan menjadi budaya positif yang perlu sentiasa diamalkan, agar kita terus dapat memberikan khidmat yang terbaik untuk rakyat.

Hadirin Yang Dihormati Sekalian,

4. Saya difahamkan program pada hari ini turut disertai oleh sukarelawan dari Universiti Malaysia Sarawak (UNIMAS). Sekalung ucapan terima kasih dan tahniah saya ucapkan.

5. Untuk makluman semua, program khidmat komuniti atau CSR ini bukanlah sesuatu yang asing malah merupakan satu pendekatan Strategi Lautan Biru (*Blue Ocean Strategy*) yang telah diilhamkan oleh YAB Perdana Menteri, Dato' Seri Najib bin Tun Abdul Razak. Melalui strategi ini, kerajaan telah menekankan kerjasama erat di antara semua sektor dan agensi kerajaan termasuk penglibatan pihak swasta dengan mengoptimumkan sumber aset, tenaga kerja, kewangan dan kemahiran masing - masing semasa pelaksanaan sesuatu program. Usaha Strategi Lautan Biru ini adalah bagi mencapai keseimbangan sosioekonomi, seterusnya memastikan kesejahteraan masyarakat terbelah dan kebajikan rakyat tidak tergalas dibahu sebelah pihak semata-mata.

Hadirin Yang Dihormati Sekalian,

6. Saya difahamkan Program CSR pada hari ini melibatkan kerja – kerja membaikpulih dan mengecat surau sedia ada. Saya percaya, “wajah baharu” surau tersebut akan memberi lebih keselesaan kepada penghuni rumah ini untuk menunaikan ibadat di samping menggalakkan lebih banyak aktiviti dan program kerohanian dijalankan kepada penghuninya pada masa – masa akan datang.
7. Saya juga sempat melawat ke bilik akademik sebentar tadi, di mana bilik tersebut kini dilengkapi dengan meja dan kerusi untuk kemudahan pembelajaran anak – anak penghuni di sini. Menjadi harapan saya agar kemudahan ini dimanfaatkan dengan sebaik – baiknya.

8. Saya berharap lebih banyak lagi pihak tampil untuk menghulurkan bantuan dan sumbangan dalam apa jua bentuk untuk manfaat anak – anak disini. Anak – anak yang berada dihadapan tuan / puan sekarang ini, sebenarnya melihat segala usaha, tenaga dan sumbangan yang dihulurkan oleh tuan / puan kepada mereka dengan rasa syukur dan terima kasih. Malah, percayalah, mereka turut menjadikan khidmat bakti tuan / puan sebagai inspirasi, contoh ikutan dan semangat buat mereka untuk turut membantu masyarakat apabila mereka dewasa kelak.

9. Saya yakin, sumbangan dan program seperti pada hari ini – walaupun kecil, akan memberi impak dan kesan yang besar terutamanya kepada pertumbuhan dan perkembangan fizikal, emosi serta mental yang sihat kepada anak – anak ini. Anak – anak inilah yang suatu hari nanti akan menjadi professional dan pemimpin yang akan membangunkan negara ini mengikut aspirasi Transformasi Nasional 2050 (TN50) sebagaimana yang dicita – citakan oleh kepimpinan negara.

Hadirin Yang Dihormati Sekalian,

10. Marilah kita sama – sama berdoa agar anak – anak kita ini membesar dengan sihat dan sempurna, dijauhkan dari sebarang bahaya dan penyakit, serta memohon agar Allah SWT mempermudah segala urusan pihak pengurusan Rumah Kanak-Kanak Toh Puan Hajah Norkiah, dalam mendidik, menjaga dan membesarkan kanak – kanak di sini.

11. Akhir kata, semoga Allah SWT menerima usaha kecil kita ini dan diterima sebagai sebahagian dari amal soleh di akhirat kelak. Amin Ya Rabbal 'Alamin.

12. Dengan lafaz Bismillahirrahmanirrahim, saya menyempurnakan Program Khidmat Komuniti CREAM Bersama Rumah Kanak-Kanak Toh Puan Hajah Norkiah, Kuching, Sarawak pada hari ini.

Sekian, Wabillahitaufik Walhidayah Wassalamualaikum Warahmatullahi Wabarakatuh.